

八  
代  
詩  
選

魏第一

八代詩選四

五言第二

長沙湘潭王闔運撰

文帝曹丕

釣竿行

東越河濟水遙望大海涯  
釣竿何珊珊魚尾何從從  
行路之好者芳餌欲何爲

善哉行二首

朝日樂相樂酣飲不知醉  
悲絃激新聲長笛吐清氣

其一絃

歌感人腸四坐皆歡悅  
寥寥高堂上涼風入我室

其二持滿

如不盈有德者能卒  
君子多苦心所愁不但一

其三慊慊下

八代詩選

五言二

一

白屋吐握不可失眾賓飽滿歸主人苦不悉

其四

比翼翔雲

漢羅者安所羈冲靜得自然榮華何足爲

其五

朝游高臺觀夕宴華池陰大酋奉甘醪狩人獻嘉禽

其六

齊

倡發東舞秦箏奏西音有客從南來爲我彈清琴

其七

五音

紛繁會拊者激微吟淫魚乘波聽踴躍自浮沈

其八

飛鳥翻

翔舞悲鳴集北林樂極哀情來寥亮摧肝心

其九

清角豈不

妙德薄所不任大哉子野言弭絃且自禁

其十

折楊柳行

西山亦何高高高殊無極上有兩仙僮不飲亦不食與我

一丸藥光耀有五色服藥四五日身體生羽翼輕舉乘浮

雲倏忽行萬億流覽觀四海茫茫非所識彭祖稱七百悠  
悠安可原老聃適西戎於今竟不還王喬假虛辭赤松垂  
空言達人識真僞愚夫好妄傳追念往古事憤憤千萬端  
百家多迂怪聖道我所觀

芙蓉池作

乘輦夜行游逍遙步西園雙渠相漑灌嘉木繞通川卑枝  
拂羽蓋修條摩蒼天驚風扶輪轂飛鳥翔我前丹霞夾明  
月華星出雲間上天垂光彩五色亦何鮮壽命非松喬誰  
能得神仙遨游快心意保已終百年

於立武陂作

八代詩選

五言二

二

兄弟其行游驅車出西城野田廣開闢川渠互相經黍稷  
何鬱鬱流波激悲聲菱茨覆綠水芙蓉發丹榮柳垂重蔭  
綠向我池邊生乘渚望長洲羣鳥謹譁鳴萍藻泛濫浮澹  
澹隨風傾忘憂其容與暢此千秋情

至廣陵於馬上作

觀兵臨江水水流何湯湯戈矛成山林玄甲耀日光猛將  
懷暴怒膽氣正縱橫誰云江水廣一葦可以航不戰屈敵  
虜敢兵稱賢良古公宅岐邑實始翦殷商孟獻營虎牢鄭  
人懼稽顙充國務耕殖先零自破亡興農淮泗間築室都  
徐方量宜運權略六軍咸悅康豈如東山詩悠悠多憂傷

雜詩二首

漫漫秋夜長烈烈北風涼展轉不能寐披衣起彷徨彷徨  
忽已久白露沾我裳俯視清水波仰看明月光天漢回西  
流三五正縱橫草蟲鳴何悲孤雁獨南翔鬱鬱多悲思綿  
綿思故鄉願飛安得翼欲濟河無梁向風長歎息斷絕我  
中腸

西北有浮雲亭亭如車蓋惜哉時不遇適與飄風會吹我  
東南行行行至吳會吳會非我鄉安得久留滯棄置勿復  
陳客子常畏人

於清河見輓船士新婚與妻別一首

八  
仙  
詩  
選  
魏  
一  
三  
與君結新婚宿昔當別離涼風動秋草蟋蟀鳴相隨冽冽  
寒蟬吟蟬吟抱枯枝枯枝時飛揚身體忽遷移不悲身遷  
移但惜歲月馳歲月無窮極會合安可知願爲雙黃鵠比  
翼戲清池

清河作

方舟戲長水湛澹自浮沈絃歌發中流悲響有餘音音聲  
入君懷悽愴傷人心心傷安所念但願恩情深願爲晨風  
鳥雙飛翔北林

甄皇后

當從玉臺改  
爲魏明帝作

樂府塘上行

蒲生我池中其葉何離離旁能行仁義莫若妾自知眾口  
鑠黃金使君生別離念君去我時獨愁常苦悲想見君顏  
色感結傷心脾念君常苦悲夜夜不能寐莫以賢豪故棄  
捐素所愛莫以魚肉賤棄捐慈與薤莫以麻泉賤棄捐營  
與蒯出亦復愁苦入亦復苦愁邊地多悲風樹木何儻儻  
從軍致獨樂延年壽千秋

明帝勅

長歌行

靜夜不能寐耳聽眾禽鳴大城育狐兔高墉多鳥聲壞宇  
何寥廓宿屋邪草生中心感時物撫劍下前庭翔祥於階



際景星一何明仰首觀靈宿北辰奮休榮哀彼失羣燕喪  
偶獨熒熒單心誰與侶造房孰與成徒然喟有和悲慘傷  
人情余情偏易感懷往增憤盈吐吟音不徹泣涕沾羅纓  
苦寒行

悠悠發洛都龔我征東行征行彌二旬屯吹隴陂城顧觀  
故壘處皇祖之所營屋室若平昔棟宇無邪傾奈何我皇  
祖潛德隱聖形雖沒而不朽書貴垂伐名光光我皇祖軒  
耀同其榮遺化布四海八表以肅清雖有吳蜀寇春秋足  
耀兵徒悲我皇祖不永享百齡賦詩以寫懷伏軾淚霑纓  
權歌行

王者布大化配乾稽后祇陽育則陰殺晷景應度移文德  
以時振武功伐不隨重華舞千戚有苗服從媯蠢爾吳中  
虜憑江樓山阻哀哉王士民瞻仰靡依怙皇上悼愍斯宿  
昔奮天怒發我許昌宮列舟於長浦翼日乘波揚棹歌悲  
且涼太常拂白日旗幟紛設張將抗旄與鉞耀威於彼方  
伐罪以弔民清我東南疆

種瓜篇

種瓜東井上冉冉自踰垣與君新爲婚瓜葛相結連寄託  
不肖軀有如倚太山兔絲無根株蔓延自登緣萍藻託清  
流常恐身不全被蒙邱山惠賤妾執拳拳天日照知之想

君亦俱然

曹植

薤露行

天地無窮極陰陽轉相因人居一世間忽若風吹塵願得  
展功勤輸力於明君懷此王佐才慷慨獨不羣鱗介尊神  
龍走獸宗麒麟蟲獸猶知德何況於士人孔氏刪詩書王  
業燦已分騁我徑寸翰流藻垂華芬

惟漢行

太極定二儀清濁始以形三光炤八極天道甚著明爲人  
立君長欲以遂其生行仁章以瑞變故誠驕盈神高而聽

卑報若響應聲明主敬細微三季膏天經二皇稱至化盛  
哉唐虞庭禹湯繼厥德周亦致太平在昔懷帝京日昃不  
敢甯濟濟在公朝萬載馳其名

君子行

君子防未然不處嫌疑間瓜田不納履李下不正冠嫂叔  
不親授長幼不比肩勞謙得其柄和光甚獨難周公下白  
屋吐哺不及餐一沐三握髮後世稱聖賢

鰕鰕篇

鰕鰕游橫潦不知江海流燕雀戲藩柴安識鴻鶴游世士  
此誠明大德固無儔駕言登五嶽然後小陵丘俯觀上路

人勢利惟是謀讐高念皇家遠懷柔九州撫劍而雷音猛  
氣縱橫浮汎泊徒嗷嗷誰知壯士憂

吁嗟篇

吁嗟此轉蓬居世何獨然長與本根逝宿夜無休閒東西  
經七陌南北越九阡卒遇回風起吹我入雲間自謂終天  
路忽然下沈泉驚飈接我出故歸彼中田當南而更北謂  
東而反西宕宕當何依忽亡而復存飄颻周八澤連翩歷  
五山流轉無恆處誰知吾苦艱願爲中林草秋隨野火燔  
糜滅豈不痛願與根荄連

豫章行

鴛鴦自朋親不若比翼連他人雖同盟骨肉天性然周公  
穆康叔管蔡則流言子臧讓干乘季札慕其賢

蒲生行浮萍篇

浮萍寄清水隨風東西流結髮辭嚴親來爲君子仇恪勤  
在朝夕無端獲罪尤在昔蒙恩惠和樂如瑟琴何意今摧  
頽曠若商與參茱萸自有芳不若桂與蘭新人雖可愛無  
若故所懽行雲有反期君恩儻中還慊慊仰天歎愁心將  
何憇日月不恆處人生忽若寓悲風來入懷淚下如垂露  
發篋造裳衣裁縫紉與素

篋篋引

置酒高殿上親友從我游中廚辦豐膳烹羊宰肥牛秦箏  
何慷慨齊瑟和且柔陽阿奏奇舞京洛出名謳樂飲過三  
爵緩帶傾庶羞主稱千金壽賓奉萬年酬久要不可忘薄  
終義所尤謙謙君子德磬折欲何求驚風飄白日光景馳  
西流盛時不可再百年忽我適生存華屋處零落歸山丘  
先民誰不死知命復何憂

野田黃雀行

高樹多悲風海水揚其波利劍不在掌結友何須多不見  
籬間雀見鷓自投羅羅家得雀喜少年見雀悲拔劍捎羅  
網黃雀得飛飛飛摩蒼天來下謝少年

怨歌行

爲君旣不易爲臣良獨難忠信事不顯乃有見疑慮周公  
佐成王金滕功不刊推心輔王室二叔反流言待罪居東  
國泣涕常流連皇靈大動變震雷風且寒拔樹偃秋稼天  
威不可干素服開金滕感悟求其端公旦事旣顯成王乃  
哀歎吾欲竟此曲此曲悲且長今日樂相樂別後莫相忘  
升天行

扶桑之所出乃在朝陽谿中心陵蒼昊布葉蓋天涯日出  
登東幹旣夕沒西枝願得紆陽轡迴日使東馳

五游



九州不足步願得凌雲翔逍遙八紘外游目歷遐荒披我  
丹霞衣襲我素霓裳華蓋芬晻藹六龍仰天驥矚靈未移  
景倏忽造昊蒼閭闔啟丹扉雙闕曜朱光徘徊文昌殿登  
陟太微堂上帝休西櫺羣后集東廂帶我瓊瑤佩漱我沆  
瀣漿踟躕玩靈芝徙倚弄華芳王子奉仙藥羨門造奇方  
服食享遐紀延壽保無疆

鬪雞篇

游目極妙伎清聽厭宮商主人寂無爲眾賓進樂方長筵  
坐戲客鬪雞間觀房羣雄正翕赫雙翅自飛揚揮羽激清  
風轉目發朱光背落輕毛散嚴距往往傷長鳴入青雲扇

翼獨翱翔願蒙狸膏助常得擅此場

聖皇篇

聖皇應歷數正康帝道休九州咸賓服威德洞八幽三公  
奏諸公不得久淹留蕃位任至重舊章咸率由侍臣省文  
奏陛下體仁慈沈吟有愛戀不忍聽可之迫有官典憲不  
得顧恩私諸王當就國璽綬何累縷便時舍外殿宮省寂  
無人主上增顧念皇母懷苦辛何以爲贈賜傾府竭寶珍  
文錢百億萬采帛若煙雲乘輿服御物錦羅與金銀龍旂  
垂九旒羽蓋參班輪諸王自計念無功荷厚德思一效筋  
力糜軀以報國鴻臚擁節衛副使隨經營貴戚並出送夾

道交輜輶車服齊整設鞞暉耀天精武騎衛前後鼓吹簫  
笳聲祖道魏東門淚下霑冠纓扳蓋因內顧俯仰慕同生  
行行將日暮何時還闕庭車輪爲徘徊四馬躊躇鳴路人  
尙酸鼻何況骨肉情

靈芝篇

靈芝生玉池朱草被洛濱榮華相晃耀光采暉若神古時  
有虞舜父母頑且嚚盡孝於田壠烝烝不違仁伯瑜年七  
十綵衣以娛親慈母笞不痛歔歔涕霑巾丁蘭少失母自  
傷早孤熒刻木當嚴親朝夕致三牲暴子見陵侮犯罪以  
忘刑丈人爲泣血免戾全其名董永遭家貧父老財無遺

舉假以供養傭作致甘肥責家填門至不知何用歸天靈  
感至德神女爲秉機歲月不安居嗚呼我皇考生我旣已  
晚棄我何其早蓼莪誰所興念之令人老退詠南風詩灑  
淚滿襟抱亂曰聖皇君四海德教朝夕宣萬國咸禮讓百  
姓家肅虔庠序不失儀孝悌處中田戶有曾閔子比屋皆  
仁賢髻亂無天齒黃髮盡其年陛下三萬歲慈母亦復然

精微篇

精微爛金石至心動神明杞妻哭死夫梁山爲之傾子丹  
西質秦烏白馬角生鄒衍囚燕市繁霜爲夏零關東有賢  
女自字蘇來卿壯年報父仇身沒垂功名女休逢赦書白

刃幾在頸俱上列仙籍去死獨就生大倉令有罪遠徵當  
就拘自悲居無男禍至無與俱緹縈痛父言荷擔西上書  
盤桓北闕下泣淚何漣如乞得并姊弟沒身贖父軀漢文  
感其義肉刑法用除其父得以免辯義在列圖多男亦何  
爲一女足成居簡子南渡河津吏廢舟船執法將加刑女  
媚擁權前妾父聞君來將涉不測淵畏懼風波起禱祀祭  
名川備禮饗神祇爲君求福先不勝醑祀誠至今犯罰艱  
君必欲加誅乞使知罪誓妾願以身代至誠感蒼天國君  
高其義其父用赦原河激奏中流簡子知其賢歸聘爲夫  
人榮寵超後先辯女解父命何況健少年黃初發和氣明

堂德教施治道致太平禮樂風俗移刑措民無枉怨女復何爲聖皇長壽考景福常來儀

當欲游南山行

東海廣且深由卑下百川五嶽雖高大不逆垢與塵良木不十圍洪條無所因長者能博愛天下寄其身大匠無棄材船車用不均錐刀各異能何所獨卻前嘉善而矜愚大聖亦同然仁者各壽考四坐咸萬年

名都篇

名都多妖女京洛出少年寶劍直千金被服麗且鮮鬪雞東郊道走馬長楸間馳騁未能半雙兔過我前攬弓捷鳴

鐫長驅上南山左挽因右發一縱兩禽連餘巧未及展仰  
手接飛鳶觀者咸稱善眾工歸我妍歸來宴平樂美酒斗  
十千膾鯁騰胎鰕炮鼈炙熊蹯鳴儔嘯匹侶列坐竟長筵  
連翩擊鞠壤巧捷惟萬端白日西南馳光景不可攀雲散  
還城邑清晨復來還

美女篇

美女妖且閒採桑岐路間柔條紛冉冉落葉何翩翩攘袖  
見素手皓腕約金環頭上金爵釵腰佩翠琅玕明珠交玉  
體珊瑚間木難羅衣何飄飄輕車隨風還顧盼遺光彩長  
嘯氣若蘭行徒用息駕休者以忘餐借問女安居乃在城

南端青樓臨大路高門結重關容華耀朝日誰不希令顏  
媒氏何所營玉帛不時安佳人慕高義求賢良獨難眾人  
徒嗷嗷安知彼所觀盛年處房室中夜起長歎

白馬篇

白馬飾金羈連翩西北馳借問誰家子幽并游俠兒少小  
去鄉邑揚聲沙漠垂宿昔秉良弓楛矢何參差控弦破左  
的右發摧月支仰手接飛猱俯身散馬蹄狡捷過猴猿勇  
剽若豹螭邊城多警急胡虜數遷移羽檄從北來厲馬登  
高隄長驅蹈匈奴左顧陵鮮卑棄身鋒刃端性命安可懷  
父母且不顧何言子與妻名編壯士籍不得中顧私捐軀



赴國難視死忽如歸

遠游篇

遠游臨四海俯仰觀洪波大魚若曲陵承浪相經過靈鼈  
戴方丈神嶽儼嵯峨仙人翔其隅玉女戲其阿瓊蓋可療  
饑仰首吸朝霞崑崙本吾宅中州非我家將歸謁東父一  
舉超流沙鼓翼舞時風長嘯激清歌金石固易敝日月同  
光華齊年與天地萬乘安足多

仙人篇

仙人攬六著對博太山隅湘娥拊琴瑟秦女吹笙竽玉樽  
盈桂酒河伯獻神魚四海一何局九州安所如韓終與王

喬要我於天衢萬里不足步輕舉凌太虛飛騰踰景雲高  
風吹我軀迴駕觀紫微與帝合靈符閭闔自嵯峨雙闕萬  
丈餘玉樹扶道生白虎夾門樞驅風游四海東過王母廬  
俯觀五嶽間人生如寄居潛光養羽翼進趨且徐徐不見  
軒轅氏乘龍出鼎湖徘徊九天上與爾長相須

盤石篇

盤盤山顛石飄飄澗底蓬我本太山人何爲客淮東蒹葭  
彌斥土林木無分重圻巖苦崩缺湖水何洶洶蚌蛤被濱  
涯光彩如錦虹高波淩雲霄浮氣象螭龍鯨脊若上陵鬚  
若山上松呼吸吞船櫂澎湃戲中鴻方舟尋高價珍寶麗

以通一舉必千里乘颶舉帆幢經危履險阻未知命所鍾  
常恐沈黃壚下與龜龍同南極蒼梧野游盼窮九江中夜  
指參辰欲歸當定從仰天長太息思想懷故邦乘桴何所  
志吁嗟我孔公

驅車篇

驅車揮駑馬東到奉高城神哉彼泰山五嶽專其名隆高  
貫雲霓嵯峨出太清周流二六埃間置十二亭上有湧醴  
泉玉石揚華英東北望吳野西眺觀日精魂神所繫屬逝  
者感斯征王者以歸天效厥元功成歷代無不遵禮記有  
品程探策或長短惟德享利貞封者七十帝軒皇元獨靈

餐霞漱沆瀣毛羽被身形發舉蹈虛廓徑庭升窈冥同壽  
東父年曠代永長生

種葛篇

種葛南山下葛藟自成陰與君初婚時結髮恩義深懽愛  
在枕席宿昔同衣衾竊慕棠棣篇好樂和瑟琴行年將晚  
暮佳人懷異心恩紀曠不接我情遂抑沈出門當何顧徘徊  
步北林下有交頸獸仰見雙棲禽攀枝長歎息淚下沾  
羅襟良馬知我悲延頸代我吟昔爲同池魚今爲商與參  
往古皆歡遇我獨困於今棄置委天命悠悠安可任

棄婦篇

八代詩選

卷二

七

石榴植前庭綠葉搖縹青丹華灼烈烈璀璨彩有光榮光榮  
暉流離可以處淑靈有鳥飛來集拊翼以悲鳴悲鳴夫何  
爲丹華實不成拊心長歎息無子當歸甯有子月經天無  
子若流星天月相終始流星沒無精棲遲失所宜下與瓦  
石并憂懷從中來歎息通雞鳴反側不能寐逍遙於前庭  
踟躕還入房肅肅帷幕聲攀幃更攝帶撫弦彈鳴箏慷慨  
有餘音要妙悲且清收淚長歎息何以負神靈招搖待霜  
露何必春夏成晚穫爲良實願君且安甯

公宴詩

公子敬愛客終宴不知疲清夜游西園飛蓋相追隨明月

澄清影列宿正參差秋蘭被長坂朱華冒綠池潛魚躍清  
波好鳥鳴高枝神飈接丹轂輕輦隨風移飄颻放志意千  
秋長若斯

侍太子坐

白日曜青春時雨靜飛塵寒冰辟炎景涼風飄我身清醴  
盈金觴餽饌縱橫陳齊人進奇樂歌者出西秦翩翩我公  
子機巧忽若神

贈徐幹

驚風飄白日忽然歸西山圓景光未滿眾星燦以繁志士  
營世業小人亦不閒聊且夜行游游彼雙闕間文昌鬱雲

興迎風高中天春鳩鳴飛棟流焱激櫺軒顧念蓬室士貧  
賤誠足憐薇藿弗充虛皮褐猶不全慷慨有悲心興文自  
成篇寶棄怨何人和氏有其愆彈冠俟知己知己誰不然  
良田無晚歲膏澤多豐年亮懷璠璣美積久德愈宣親交  
義在敦申章復何言

贈丁儀

初秋涼氣發庭樹微銷落凝霜依玉除清風飄飛閣朝雲  
不歸山霖雨成川澤黍稷委疇隴農夫安所穫在貴多忘  
賤爲恩誰能博狐白足禦冬焉念無衣客思慕延陵子寶  
劍非所惜子其甯爾心親交義不薄

贈王粲

端坐苦愁思攬衣起西游樹木發春華清池激長流中有  
孤鴛鴦哀鳴求匹儔我願執此鳥惜哉無輕舟欲歸忘故  
道願望但懷愁悲風鳴我側羲和逝不留重陰潤萬物何  
懼澤不周誰令君多念自使懷百憂

又贈丁儀王粲

從軍度函谷驅馬過西京山岑高無極涇渭揚濁清壯哉  
帝王居佳麗殊百城員闕出浮雲承露概泰清皇佐揚天  
惠四海無交兵權家雖愛勝全國爲令名君子在末位不  
能歌德聲丁生怨在朝王子歡自營歡怨非貞則中和誠



可經

贈丁翼

嘉賓填城闕豐膳出中廚吾與二三子曲宴此城隅秦箏  
發西氣齊瑟揚東謳肴來不虛歸觴至反無餘我豈狎異  
人朋友與我俱大國多良材譬海出明珠君子義休侍小  
人德無儲積善有餘慶榮枯立可須滔蕩固大節時俗多  
所拘君子通大道無願爲世儒

贈白馬王彪一首

序曰黃初四年正月白馬王任城王與余俱朝京師會  
節氣到洛陽任城王薨至七月與白馬王還國後有司

以二王歸蕃道路宜異宿止意毒恨之蓋以大別在歎  
日是用自剖與王辭焉憤而成篇

謁帝承明廬逝將歸舊疆清晨發皇邑日夕過首陽伊洛  
廣且深欲濟川無梁汎舟越洪濤怨彼東路長顧瞻戀城  
闕引領情內傷

其一

太谷何寥廓山樹鬱蒼蒼霖雨泥我塗

流潦浩縱橫中逵絕無軌改轍登高岡修坂造雲日我馬

玄以黃

其二

玄黃猶能進我思鬱以紆鬱紆將何念親愛在

離居本圖相與偕中更不克俱鴟梟鳴衡軼豺狼當路衢

蒼蠅間白黑讒巧反親疏欲還絕無蹊攬轡止踟躕

其三

躡亦何留相思無終極秋風發微涼寒蟬鳴我側原野何

蕭條白日忽西匿歸鳥赴喬林翩翩厲羽翼孤獸走索羣

銜草不遑食感物傷我懷撫心長太息

其四

太息將何爲天

命與我違奈何念同生一往形不歸孤魂翔故域靈柩寄

京師存者忽已過亡沒身自衰人生處一世去若朝露晞

年在桑榆間影響不能追自顧非金石咄喏令心悲

其五

悲動我神棄置莫復陳丈夫志四海萬里猶比鄰恩愛苟

不虧在遠分日親何必同衾幃然後展慙歎憂思成疾疢

無乃兒女仁倉卒骨肉情能不懷苦辛

其六

苦辛何慮思天

命信可疑虛無求列仙松子久吾欺變故在斯須百年誰

能持離別永無會執手將何時王其愛玉體俱享黃髮期

收淚卽長路援筆從此辭

送應氏詩二首

步登北邙阪遙望洛陽山洛陽何寂寞宮室盡燒焚垣墻  
皆頓擗荆棘上參天不見舊耆老但覩新少年側足無行  
徑荒疇不復田游子久不歸不識陌與阡中野何蕭條千  
里無人煙念我平常居氣結不能言

清時難屢得嘉會不可常天地無終極人命若朝霜願得  
展嬾婉我友之朔方親昵並集送置酒此河陽中饋豈獨  
薄賓飲不盡觴愛至望苦深豈不愧中腸山川阻且遠別  
促會日長願爲比翼鳥施翮起高翔

三良詩

功名不可爲忠義我所安秦穆先下世三臣皆自殘生時  
等榮樂既沒同憂患誰言捐軀易殺身誠獨難攬涕登君  
墓臨穴仰天歎長夜何冥冥一往不復還黃鳥爲悲鳴哀  
哉傷肺肝

雜詩

明月照高樓流光正徘徊上有愁思婦悲歎有餘哀借問  
歎者誰言是宕子妻君行踰十年孤妾常獨棲君若清路  
塵妾若濁水泥浮沈各異勢會合何時諧願爲西南風長  
逝入君懷君懷良不開賤妾當何依

西北有織婦綺縞何繽紛  
明晨秉機杼日昃不成文  
太息終長夜悲嘯入青雲  
妾身守空閨良人行從軍  
自期三年歸今已歷九春  
飛鳥遶樹翔嗷嗷鳴索羣  
願爲南流景馳光見我君

微陰翳陽景清風飄我衣  
游魚潛綠水翔鳥薄天飛  
渺渺客行士遙役不得歸  
始出嚴霜結今來白露晞  
游子歎黍離處者歌式微  
慷慨對嘉賓悽愴內傷悲

攬衣出中閨逍遙步兩楹  
問房何寂寞綠草被階庭  
空室自生風百鳥翩南征  
春思安可忘憂戚與我并  
佳人在遠道妾身單且勞  
歡會難再遇芝蘭不重榮  
人皆棄舊愛君

豈若平生寄松爲女蘿依水如浮萍齋身奉衿帶朝夕不  
墮傾儻終願盼恩永副我中情

南國有佳人容華若桃李朝游江北岸夕宿瀟湘沚時俗  
薄朱顏誰爲發皓齒俯仰歲將暮榮耀難久恃

高臺多悲風朝日照北林之子在萬里江湖迥且深方舟  
安可極離思故難任孤雁飛南游過庭長哀吟翹思慕遠  
人願欲託遺音形影忽不見翩翩傷我心

轉蓬離本根飄颻隨長風何意迴颺舉吹我入雲中高高  
上無極天路安可窮類此游客子捐軀遠從戎毛褐不掩  
形薇藿常不充去去莫復道沈憂令人老

僕夫早嚴駕吾將遠行游遠游欲何之吳國爲我仇將騁  
萬里塗東路安足由江介多悲風淮泗馳急流願欲一輕  
濟惜哉無方舟閒居非吾志甘心赴國憂

飛觀百餘尺臨牖御櫺軒遠望周千里朝夕見平原烈士  
多悲心小人媮自閒國仇亮不塞甘心思喪元拊劍西南  
望思欲赴太山絃急悲風發聆我慷慨言

喜雨詩

天覆何彌廣苞育此羣生棄之必憔悴惠之則滋榮慶雲  
從北來鬱述西南征時雨中夜降長雷周我庭嘉種盈膏  
壤登秋畢有成



失題

雙鶴俱遨遊相失東海旁雄飛竄北朔雌驚赴南湘棄我  
交頸歡離別各異方不惜萬里道但恐天網張

七步詩

煮豆持作羹漉豉以爲汁萁在釜中然豆在釜中泣本是  
同根生相煎何太急

雜詩

悠悠遠行客去家千餘里出亦無所之入亦無所止浮雲  
翳日光悲風動地起

應璩

百一詩三首

下流不可處君子慎厥初名高不宿著易用受侵誣前者  
墮官去有人適我閭田家無所有酌醴焚枯魚問我何功  
德三入承明廬所占於此土是謂仁智居文章不經國筐  
篋無尺書用等稱才學往往見歎譽避席跪自陳賤子實  
空虛宋人遇周客慙愧靡所如

年命在桑榆東岳與我期長短有常會遲速不得辭斗酒  
多爲樂無爲待來茲

室廣致凝陰臺高來積陽奈何季世人侈靡在宮牆飾巧  
無窮極土木被朱光徵求傾四海雅意猶未康

雜詩

細微可不慎隄潰自蟻穴腠理蚤從事安復勞鍼石哲人  
覩未形愚夫闇明白曲突不見賓焦爛爲上客思願獻良  
規江海倘不逆狂言雖寡善猶有如雞跖雞跖食不已齊  
王爲肥澤

應瑗

雜詩

貧子語窮兒無錢可把撮耕自不得粟采彼北山葛簞瓢  
恆自在無用相呵喝

繆襲

挽歌

生時游國都死沒棄中野朝發高堂上暮宿黃泉下白日  
入虞淵懸車息駟馬造化雖神明安能復存我形容稍歇  
滅齒髮行當墮自古皆有然誰能離此者

杜摯

贈母仁儉

騏驥不試婆娑槽檻閒壯士志未伸坎坷多辛酸伊摯  
爲媵臣呂望身操竿夷吾困商販甯戚對牛歎食其處監  
門淮陰飢不餐買臣老負薪妻叛呼不還釋之宦十年位  
不增故官才非八子倫而與齊其患無知不在此袁盎未

有言被此萬病久榮衛動不安聞有韓眾藥信來給一丸  
母上儉

答杜摯

鳳鳥翔京邑哀鳴有所思才爲聖世出德音何不怡八子  
未際遇今者遭明時胡康出壠畝楊偉無根基飛騰冲雲  
天奮迅協光熙駿驥骨法異伯樂觀知之但當養羽翮鴻  
舉必有期體無纖微疾安用良醫聯翩輕栖集還爲燕  
雀啗韓眾藥雖良恐便不能治悠悠千里情薄言答嘉詩  
信心感諸中中賞不在辭

何宴

擬古

雙鶴比翼游羣飛戲太清常恐入網羅憂禍一旦并豈若  
集五湖順流唼浮萍逍遙放志意何爲怵惕驚

失題

轉蓬去其根流飄從風移芒芒四海涂悠悠焉可彌願爲  
浮萍草託身寄清池且以樂今日其後非所知

左延年

從軍行

從軍何等樂一驅乘雙駁鞍馬照人白龍驤自動作

程曉

嘲熱客

平生三伏時道路無行車閉門避暑臥出入不須過今世  
褊襪子觸熱到人家主人聞客來顰蹙奈此何謂當起行  
去安坐正咨嗟所說無一急階哈一何多疲瘞向之久甫  
問君極那搖扇髀中疾流汗正滂沱莫謂爲小事亦是一  
大瑕傳戒諸高明熱行宜見呵

嵇康

贈秀才入軍

雙鸞匿景曜戢翼太山崖抗首漱朝露晞陽振羽儀長鳴  
戲雲中時下息蘭池自謂絕塵埃終始永不虧何意世多

艱虞入來我疑雲網塞四區高羅正參差奮迅勢不便六  
翮無所施隱姿就長纓卒爲時所羈單雄翻孤逝哀吟傷  
生離徘徊戀儔侶慷慨高山陂鳥盡良弓藏謀極身心危  
吉凶雖在已世路多嶮巇安得反初服抱玉寶六奇逍遙  
游太清攜手長相隨

酒會詩

樂哉苑中游周覽無窮已百卉吐芳華崇基邈高峙林木  
紛交錯元池戲魴鯉輕丸斃翔禽織綸出鱸鮪坐中發美  
讚異氣同音軌臨川獻清醕微歌發皓齒素琴揮雅操清  
聲隨風起斯會豈不樂恨無東野子酒中念幽人守故彌



終始但當體七絃寄心在知己

答二郭三首

天下悠悠者下京趨上京二郭懷不羣超然來北征樂道  
託萊廬雅志無所營良時遭其願遂結歡愛情君子義是  
親恩好篤平生寡志白生災屢使眾覺成豫子匿梁側請  
政變其形顧此懷怛惕慮在苟自甯今當寄他域嚴駕不  
得停本圖終宴婉今更不克并二子贈嘉詩馥如幽蘭馨  
戀土思所親不知氣憤盈

昔蒙父兄祚少得離負荷因疏遂成懶寢蹟北山阿但願  
養性命終已靡有他良辰不我期當年值紛華坎壈趣世

務常恐嬰網羅羲農邈已遠拊膺獨咨嗟朔戒貴尙咨漁  
父好揚波雖逸亦已難非余心所嘉豈若翔區外餐瓊漱  
朝霞遺物棄鄙累逍遙游太和結友集靈嶽彈琴登清歌  
有能從此者古人豈足多

詳觀凌世務屯險多憂虞施報更相市大道匿不舒夷路  
植枳棘安步將焉如權知相傾奪名位不可居鸞鳳避爵  
羅遠託崑崙墟莊周悼靈龜越稷嗟王輿至人存諸已隱  
璞樂玄虛功名何足殉乃欲列簡書所好亮若茲楊氏歎  
交衢去去從所志敢謝道不俱

與阮德如

含哀還舊廬感切傷心肝良時遭數子談慰臭如蘭疇昔  
恨不早既面侔舊歡不悟卒永離念隔增憂歎事故無不  
有別易會良難郢人忽已逝匠石寢不言澤雉窮野草靈  
龜樂泥蟠榮名穢人身高位多災患未若捐外累肆志養  
浩然顏氏希有虞隰子慕黃軒涓彭獨何人唯志在所安  
漸漬殉近欲一往不可攀生生在豫積勿以怵自寬南土  
旱不涼矜計宜早完君其愛德素行路慎風寒自力致所  
懷臨文情辛酸

游仙詩

遙望山上松隆谷鬱青葱自遇一何高獨立迥無雙願想

游其下蹊路絕不通王喬棄我去乘雲駕六龍飄飄戲玄  
圃黃老路相逢授我自然道曠若發童蒙採藥鐘山隅服  
食改姿容蟬蛻棄穢累結友家板桐臨觴奏九韶雅歌何  
邕邕長與俗人別誰能覩其蹤

述志詩二首

潛龍育神軀濯鱗戲蘭池延頸慕大庭寢足俟皇羲慶雲  
未垂景盤桓朝陽陂悠悠非吾匹疇肯應俗宜殊類難徧  
周鄙議紛流離軼軻丁悔吝雅志不得施耕耨感甯越馬  
席激張儀逝將離羣侶杖策追洪崖焦明振六翮羅者安  
所羈浮游太清中更求新相知比翼翔雲漢飲路餐瓊枝

多念世間人夙駕咸驅馳沖靜得自然榮華安足爲

斥鷃擅蒿林仰笑神鳳飛坎井蝻蛭宅神龜安所歸恨自  
用身拙任意多永思遠實與世殊義譽非所希往事旣已  
謬來者猶可追何爲人事間自令心不夷慷慨思古人夢  
想見容輝願與知己遇舒憤啟其微巖穴多隱逸輕舉求  
吾師晨登箕山巔日夕不知饑立居養營魄千載長自綏

稽喜

答稽康

華堂臨浚沼靈芝茂清泉仰瞻青禽翔俯察綠水濱逍遙  
步蘭渚感物懷古人李叟寄周朝莊生游漆園時至忽蟬

蛻變化無常端

君子體變通否泰非常理當流則義行時游則鵲起達者  
鑒通塞盛衰爲表裏列仙狗生命松喬安足齒縱軀任世  
度至人不私已

達人與物化世俗安可論都邑可優游何必棲山原孔父  
策良駟不云世路難出處因時資潛躍無常端保心守道  
居視變安能遷

郭遐周

贈稽康

吾無佐世才時俗不可量歸我北山阿逍遙以倡佯同氣

自相求虎嘯谷風涼惟予與稽生未面分好彰古人美傾  
蓋方此何不臧援箏執鳴琴攜手游空房棲遲衡門下何  
願於姬姜予心好永年年永懷樂康我友不期卒改計適  
他方巖東咸發日翻然將高翔離別在旦夕惆悵以增傷  
風人重離別行道猶遲遲宋玉哀登山臨水送將歸伊此  
往昔事言之以增悲歎我與稽生倏忽將永違俯察淵魚  
遊仰觀雙鳥飛厲翼太清中徘徊於丹池欽哉得其所令  
我心獨違言別在斯須怒焉如調饑

離別自古有人非比目魚君子不懷土豈更得安居四海  
皆兄弟何患無彼姝巖穴隱傳說寒谷納白駒方各以類

聚物亦以羣殊所在有智賢何憂此不如所貴身名存功  
烈在簡書歲時易過歷日月忽其除勛哉乎稽生敬德在  
慎軀

郭遐叔

贈稽康

君子交有義不必常相從天地有明理遠近無異同三仁  
不齊跡貴在等賢蹤眾鳥羣相追鷺鳥獨無雙何必相响  
濡江海自可容願各保遐心有緣復來東

阮侃

答稽康



早發溫泉廬夕宿宣陽城顧盼懷惆悵言思我友生會遇  
一何幸及子邁歡情交際雖未久思愛發中誠良玉須切  
磋瑱璠就其形隋珠豈不曜雕瑩啟光榮與子猶蘭石堅  
芳互相成庶幾行古道伐檀俟河清不謂中離別飄飄然  
遠征臨輿執手訣良誨一何精佳言盈我耳援帶以自銘  
唐虞曠千載三代不可并洙泗久已往微言誰其聽曾參  
易簣斃仲由結其纓晉楚安足慕屢空守以貞潛龍尙泥  
蟠神龜隱其靈庶保吾子言養真以全生東野多所患暫  
往不久停幸子無損思逍遙以自甯

雙美不易居嘉會故難常爰處憩斯土與子邁蘭芳常願

永游集拊翼同迴翔不悟卒永離一別爲異鄉四牡一何  
速征人告路長願步懷想像游目屢太行撫轡增歎息念  
子安能忘恬和爲道基老氏惡強梁患至有身災榮子知  
所康神龜實可樂明戒在刳腸新詩何篤穆申詠增慨慷  
舒檢話良訊終焉永厭藏還誓必不食復與同故房願子  
邊憂慮無以情自傷俟路忘所以聊以酬來章

阮籍

詠懷八十二首

夜中不能寐起坐彈鳴琴薄帷鑒明月清風吹我襟孤鴻  
號外野翔鳥鳴北林徘徊將何見憂思獨傷心

二妃游江濱逍遙順風翔交甫懷環珮婉孌有芬芳猗靡  
情歡愛千載不相忘傾城迷下蔡容好結中腸感激生憂  
思萱草樹蘭房膏沐爲誰施其雨怨朝陽如何金石交一  
旦更離傷

嘉樹下成蹊東園桃與李秋風吹飛藿零落從此始繁華  
有憔悴堂上生荆杞驅馬舍之去去上西山趾一身不自  
保何況戀妻子凝霜被野草歲暮亦云已

天馬出西北由來從東道春秋非有託富貴焉常保清露  
被皋蘭凝霜霑野草朝爲媚少年夕暮成醜老自非王子  
晉誰能常美好

平生少年時輕薄好絃歌  
西游咸陽中趙李相經過  
娛樂未終極白日忽蹉跎  
驅馬復來歸反顧望三河  
黃金百鎰盡資用常苦多  
北臨太行道失路將如何

昔聞東陵瓜近在青門外  
連畛距阡陌子母相鉤帶  
五色曜朝日嘉賓四面會  
膏火自煎熬多財爲患害  
布衣可終身寵祿豈足賴

炎暑惟茲夏三旬將欲移  
芳樹垂綠葉青雲自透迤  
四時更代謝日月遞參差  
徘徊空堂上怗怗莫我知  
願睹卒歡好不見悲別離

灼灼西隕日餘光照我衣  
迴風吹四壁寒鳥相因依  
周

尚銜羽蛩蛩亦念饑如何當路子磬折忘所歸豈爲夸譽  
名憔悴使心悲甯與燕雀翔不隨黃鵠飛黃鵠游四海中  
路將安歸

步出上東門北望首陽岑下有采薇士上有嘉樹林良辰  
在何許凝霜霑衣襟寒風振山岡玄雲起重陰鳴雁飛南  
征鷓鴣發哀音素質游商聲悽愴傷我心

北里多奇舞濮上有微音輕薄閒游子俯仰乍浮沈捷徑  
從狹路僂俛趨荒淫焉見王子喬乘雲翔鄧林獨有延年  
術可以慰我心

湛湛長江水上有楓樹林皋蘭被徑路青驪逝駸駸遠望

令人悲春氣感我心三楚多秀士朝雲進荒淫朱華振芬  
芳高蔡相追尋一爲黃雀哀淚下誰能禁

昔日繁華子安陵與龍陽天天桃李花灼灼有輝光悅懌  
君九春馨折似秋霜流盼發姿媚言笑吐芬芳攜手等歡  
愛宿昔同衣裳願爲雙飛鳥比翼共翱翔丹青著明誓永  
世不相忘

登高臨四野北望青山阿松柏翳岡岑飛鳥鳴相過感慨  
懷辛酸怨毒常苦多李公悲東門蘇子狹三河求仁自得  
仁豈復歎咨嗟

開秋兆涼氣蟋蟀鳴牀帷感物懷殷憂悄悄令心悲多言

焉所告緜辭將訴誰微風吹羅袂明月耀清暉晨雞鳴高  
樹命駕起旋歸

昔年十四五志尙好詩書被褐懷珠玉顏閔相與期開軒  
臨四野登高望所思墓蔽山岡萬代同一時千秋萬歲  
後榮名安所之乃悟羨門子噉噉今自嗤

徘徊蓬池上還願望大梁綠水揚洪波曠野莽茫茫走獸  
交橫馳飛鳥相隨翔是時鶉火中日月正相望朔風厲嚴  
寒陰氣下微霜羈旅無儔匹俛仰懷哀傷小人計其功君  
子道其常豈惜終憔悴詠言著斯章

獨坐空堂上誰可與歡者出門臨永路不見行車馬登高

望九州悠悠分曠野孤鳥西北飛離獸東南下日暮思親  
友晤言用自寫

懸車在西南羲和將欲傾流光耀四海忽忽至夕冥朝爲  
咸池暉蒙汜受其榮豈知窮達士一死不再生視彼桃李  
花誰能久熒熒君子在何許歎息未合并瞻仰景山松可  
以慰吾情

西方有佳人皎若白日光被服織羅衣左右珮雙璜修容  
耀姿美順風振微芳登高眺所思舉袂當朝陽寄顏雲霄  
間揮袖凌虛翔飄飄恍惚中流盼顧我旁悅懌未交接晤  
言用感傷



楊朱泣岐路墨子悲染絲  
揖讓長離別飄緇難與期  
豈徒燕婉情存亡誠有之  
蕭索人所悲禍釁不可辭  
趙女媚中山謙柔愈見欺  
嗟嗟塗上士何用自保持

於心懷寸陰羲陽將欲冥  
揮袂撫長劍仰觀浮雲征  
雲間有玄鶴抗志揚哀聲  
一飛冲青天曠世不再鳴  
豈與鷓鴣游連翩戲中庭

夏后乘靈輿夸父爲鄧林  
存亡從變化日月有浮沈  
鳳凰鳴參差伶倫發其音  
王子好簫管世世相追尋  
誰言不可見青鳥明我心

東南有射山汾水出其陽  
六龍服氣輿雲蓋切天綱  
仙者

四五人逍遙冥蘭房寢息一純和呼噏成露霜沐浴丹淵  
中照耀日月光豈安通靈臺游瀆去高翔

殷憂令志結怵惕常若驚逍遙未終寔朱華忽西傾蟋蟀  
在戶牖蟪蛄鳴中庭心腸未相好誰云亮我情願爲雲間  
鳥千里一哀鳴三芝延瀛洲遠游可長生

拔劍臨白刃安能相中傷但畏工言子稱我三江旁飛泉  
流玉山懸車棲扶桑日月徑千里素風發微霜勢路有窮  
達咨嗟安可長

朝登洪坡顛日夕望西山荆棘被原野羣鳥飛翩翩鸞鷺  
時棲宿性命有自然建木誰能近射干復嬋娟不見林中

葛延蔓相句連

周鄭天下交街術當三河妖冶閒都子煥燿何芬葩玄髮  
發朱顏睇眇有光華傾城思一顧遺視來相誇願爲三春  
游朝陽忽蹉跎盛衰在須臾離別將如何

若花燿四海扶桑翳瀛洲日月經天塗明暗不相讐窮達  
自有常得失又何求豈效路上童攜手共遨游陰陽有變  
化誰云沈不浮朱鷺躍飛泉夜飛過吳洲俯仰運天地再  
撫四海流繫累名利場駑駿同一轡豈若遺耳目升遐去  
殷憂

昔余游大梁登于黃華顛其工宅玄冥高臺造青天幽荒

邈悠悠悽愴懷所憐所憐者誰子明察自照妍應龍沈冀  
州妖女不得眠肆侈陵世俗豈云永厥年

驅車出門去意欲遠征行征行安所如背棄夸與名夸名  
不在已但願適中情單帷蔽皎日高樹隔微聲讒邪使交  
疏浮雲令晝暝嫵婉同衣裳一顧傾人城從容在一時繁  
華不再榮晨朝奄復暮不見所歡形黃鳥東南飛寄言謝  
友生

篤言發魏都南向望吹臺簫管有遺音梁王安在哉戰士  
食糟糠賢者處蒿萊歌舞曲未終秦兵已復來夾林非吾  
有朱宮生塵埃軍敗華陽下身竟爲土灰

朝陽不再盛白日忽西幽去此若俯仰如何似九秋人生  
若塵露天道邈悠悠齊景升牛山涕泗紛交流孔聖臨長  
川惜逝忽若浮去者余不及來者吾不留願登太華山上  
與松子游漁父知世患乘流泛輕舟

一日復一夕一夕復一朝顏色改平常精神自損消胸中  
懷湯火變化故相招萬事無窮極知謀苦不饒但恐須臾  
間魂氣隨風飄終身履薄冰誰知我心焦

一日復一朝一昏復一晨容色改平常精神自飄淪臨臆  
多哀楚思我故時人對酒不能言悽愴酸辛願耕東臯  
陽誰與守其真愁苦在一時高行傷微身由直何所爲龍

蛇爲我鄰

世務何續紛人道苦不遑壯年以時逝朝露待太陽願攬  
羲和轡白日不移光天階路殊絕雲漢邈無梁濯髮陽谷  
濱遠游崑嶽旁登彼列仙咀探此秋蘭芳時路烏足爭太  
極可翱翔

誰言萬事難逍遙可終生臨堂翳華樹悠悠念無形彷徨  
思親友倏忽復至冥寄言東飛鳥可用慰我情

嘉時在今辰零雨灑塵埃臨路望所思日夕復不來人情  
有感慨蕩漾焉能排揮涕懷哀傷辛酸誰語哉

炎光延萬里洪川蕩湍瀨彎弓掛扶桑長劍倚天外泰山

八代詩選卷一  
成砥礪黃河爲裳帶視彼莊周子榮枯何足賴捐身棄中  
野烏鳶作患害豈若雄傑士功名從此大

壯士何慷慨志欲威八荒驅車遠行役受命念自忘良弓  
挾烏號明甲有精光臨難不顧生身死魂飛揚豈爲全軀  
士效命爭戰場忠爲百世榮義使令名彰垂聲謝後世氣  
節故有常

混元生兩儀四象運衡璣曠日布炎精素月垂景輝晷度  
有昭回哀哉人命微飄若風塵逝忽若慶雲晞修齡適余  
願光寵非已威安期步天路松子與世違焉得凌霄翼飄  
颻登雲湄嗟哉尼父志何爲居九夷

天網彌四野六翮掩不舒隨波紛綸客汎汎若浮鳧生命  
無期度朝夕有不虞列仙停修齡養志在冲虛飄飄雲日  
間邈與世路殊榮名非已寶聲色焉足娛採藥無旋返神  
仙志不符逼此良可惑令我久躊躇

王業須良輔建功俟英雄元愷康哉美多士頌聲隆陰陽  
有舛錯日月不常融天時有否泰人事多盈冲園綺遯南  
嶽伯陽隱西戎保身念道真寵耀焉足崇人誰不善始  
能克厥終休哉上世士萬載垂清風

鴻鵠相隨飛飛適荒裔雙翮臨長風須臾萬里逝朝餐  
琅玕實夕宿丹山際抗身青雲中網羅孰能制豈與鄉曲



士攜手其言誓

儔物終始殊修短各異方琅玕生高山芝英耀朱堂熒熒  
桃李花成蹊將天傷焉敢希千術三春表微光自非凌風  
樹憔悴烏有常

幽蘭不可佩朱草爲誰榮修竹隱山陰射干臨增城葛藟  
延幽谷縣縣瓜瓞生樂極消靈神哀深傷人情竟知憂無  
益豈若歸太清

鸞鳩飛桑榆海鳥運天池豈不識宏大羽翼不相宜扶搖  
安可翔不若棲樹枝下集蓬艾間上游園圃籬但爾亦自  
足用子爲追隨

生命辰安在憂戚涕沾襟高鳥翔山岡鸚雀棲下林青雲  
蔽前庭素琴懷我心崇山有鳴鶴豈可相追尋

鳴鳩嬉庭樹焦明游浮雲焉見孤翔鳥翩翩無匹羣死生  
自然理消散何續紛

步游三衢旁惆悵念所思豈爲今朝見恍惚誠有之澤中  
生喬松萬世未可期高鳥摩天飛凌雲共游嬉豈有孤行  
士垂涕悲故時

清露爲凝霜華草成蒿萊誰云君子賢明達安可能乘雲  
招松喬呼噲永矣哉

丹心失恩澤重德喪所宜善言焉可長慈惠未易施不見

南飛燕羽翼正差池高子怨新詩三閩悼乖離何爲混沌  
氏倏忽體貌墮

十日出陽谷弭節馳萬里經天耀四海倏忽潛蒙汜誰言  
焱炎久游沒行可俟逝者豈長生亦去荆與杞千歲猶崇  
朝一餐聊自己是非得失間焉足相譏理計利知術窮哀  
情遽能止

自然有成理生死道無常智巧萬端出大要不易方如何  
夸毘子作色懷驕腸乘軒驅良馬憑几向膏梁被服織羅  
衣深榭設蘭房不見日夕華翩翩飛路旁

夸談快憤懣情慵發煩心西北登不周東南望鄧林曠野

彌九州崇山抗高岑一餐度萬世千歲再浮沈誰云玉石  
同淚下不可禁

人言願延年延年欲焉之黃鵠呼子安千秋未可期獨坐  
山崑中惻愴懷所思王子一何好猗靡相攜持悅懌猶今  
辰計校在一時置此明朝事日夕將見欺

貴賤在天命窮達自有時婉變佞邪子隨利來相欺孤恩  
損惠施但爲讒夫蚩鵲鶴鳴雲中載飛靡所期焉知傾側  
士一旦不可持

驚風振四野迴雲蔭堂隅牀帷爲誰設几杖爲誰扶雖非  
明君子豈闇桑與榆世有此聾瞶芒芒將焉如翩翩從風

飛悠悠去故居離靡玉山下遺棄毀與譽

危冠切浮雲長劍出天外細故何足慮高度跨一世非子  
爲我御逍遙游荒裔顧謝西王母吾將從此逝豈與蓬戶  
士彈琴誦言誓

河上有丈人緯蕭棄明珠甘彼藜藿食樂是蓬蒿廬豈效  
續紛子良馬騁輕輿朝生衢路旁夕瘞橫衢隅歡笑不終  
宴俯仰復歔歔鑿茲二三者憤懣從此舒

儒者通六藝立志不可干違禮不爲動非法不肯言渴飲  
清泉流饑食并一簞歲時無以祀衣服常苦寒屣履詠南  
風緼袍笑華軒信道守詩書義不受一餐烈烈褒貶辭老

氏用長歎

少年學擊刺妙伎過曲城英風截雲霓超世發奇聲揮劍  
臨沙漠飲馬九野垆旗幟何翩翩但聞金鼓鳴軍旅令人  
悲烈烈有哀情念我平常時悔恨從此生

平晝整衣冠思見客與賓賓客者誰子倏忽若飛塵裳衣  
佩雲氣言語究靈神須臾相背棄何時見斯人

多慮令志散寂寞使心憂翱翔觀陂澤撫劍登輕舟但願  
長閒暇後歲復來游

朝出上東門遙望首陽基松柏鬱森沈鷓黃相與嬉逍遙  
九曲間徘徊欲何之念我平居時鬱然思妖姬

王子十五年游衍伊洛濱朱顏茂春華辯慧懷清眞焉見  
浮邱公舉手謝時人輕蕩易恍惚飄飄棄其身飛鶴鳴且  
翔揮翼且酸辛

寒門不可出海水焉可浮朱明不相見奄昧獨無侯持瓜  
思東陵黃雀誠獨羞失勢在須臾帶劍上吾邱悼彼桑林  
子涕下自交流假乘汧渭間鞍馬去行游

洪生資制度被服正有常尊卑設次序事物齊紀綱容飾  
整顏色磬折執珪璋堂上置玄酒室中盛稻粱外厲貞素  
談戶內滅芬芳放口從衷出復說道義方委曲周旋儀姿  
態愁我腸

北臨乾昧谿西行游少任遙顧望天津駘蕩樂我心綺靡  
存亡門一游不再尋倘遇晨風鳥飛駕出南林澆瀆瑤光  
中忽忽肆荒淫休息宴清都超世又誰禁

人知結交易交友誠獨難險路多疑惑明珠未可干彼求  
饗太牢我欲并一餐損益生怨毒咄咄復何言

有悲則有情無悲亦無思苟非攬網罟何必萬里畿翔風  
拂重霄慶雲招所晞灰心寄枯宅曷顧人間姿始得忘我  
難焉知嘿自遺

木槿榮邱墓煌煌有光色白日頽林中翩翩零路側蟋蟀  
吟戶牖蟪蛄鳴荆棘蟬蛸玩三朝采采修羽翼衣裳爲誰



施俯仰自收拭生命幾何時慷慨各努力

修塗馳軒車長川載輕舟性命豈自然勢路有所由高名  
令志惑重利使心憂親昵懷反側骨肉還相讐更希毀珠  
玉可用登遨游

橫術有奇士黃駿服其箱朝起瀛洲野日夕宿明光再撫  
四海外羽翼自飛揚去置世上事豈足愁我腸一去長離  
絕千歲復相望

猗歟上世士恬淡自安貧季葉道陵遲馳鷺紛垢塵甯子  
豈不類揚歌誰肯殉栖栖非我偶徨徨非已倫咄嗟榮辱  
事去來味道真道真信可娛清潔存精神巢由抗高節從

此適河濱

梁東有芳草一朝再三榮  
色容豔姿美光華耀傾城  
豈爲明哲士妖蠱諂媚生  
輕薄在一時安知百世名  
路端便媚子但恐日月傾  
焉見冥靈木悠悠竟無形

秋駕安可學東野窮路旁  
綸深魚淵潛矰設鳥高翔  
汎汎乘輕舟演漾靡所望  
吹噓誰以益江湖相捐忘  
都冶難爲顏修容是我常  
茲年在松喬恍惚誠未央

咄嗟行至老僂俛常苦憂  
臨川羨洪波同始異支流  
百年何足言但苦怨與讐  
讐怨者誰子耳目還相差  
聲色爲胡越人情自逼適  
招彼玄通士去來歸羨游

昔有神仙士乃處射山阿乘雲御飛龍噓噏瓊華可聞  
不可見慷慨歎咨嗟自傷非儔類愁苦來相加下學而上  
達忽忽將如何

林中有奇鳥自言是鳳皇清朝飲醴泉日夕棲山岡高鳴  
徹九州延頸望八荒適逢商風起羽翼自摧藏一去崑崙  
西何時復迴翔但恨處非位愴悵使心傷

出門望佳人佳人豈在茲三山招松喬萬世誰與期存亡  
有長短慷慨將焉知忽忽朝日隕行行將何之不見季秋  
草摧折在今時

昔有神仙者羨門及松喬噏習九陽間升遐噏雲霄人生

樂長久百年自言遼白日隕隅谷一夕不再朝豈若遺世  
物登明遂飄颻

墓前熒熒者木槿耀朱華榮好未終朝連颺隕其葩豈若  
西山草琅玕與丹禾垂影臨增城餘光照九阿甯惟少年  
子日久難咨嗟

八代詩選

魏王言二

望

八代詩選卷第四